



Lopozisyon dan Sesel: en sel kaless kase

Depi zour parti US ki ti opouvwar pour plis ki 43-an in ganny en defet ekrazan dan dernyen eleksyon, zot ankor pe tate dan fernwanr pour kapab zwe zot nouvo rol koman en lopozisyon efektif. I kler ki zot pa ankor konpran pou dir lepok kot zot ti kapab fer sa ki zot oule in fini. Pour tro bokou letan zot ti krwar ki Sesel pa pour kapab bouz devan anba direksyon en nouvo ladministrasyon e zot fristre avek bann lakonplisman nouvo gouvènmàn dirize par lekip LDS. Sesel pe bouze e Seselwa i ranpli avek lespwar pour en lavenir meyer malgre bann defi koze par sa pandemi COVID 19.

Prezidan US ensi ki son Sekreter Zeneral e menm zot sef egzekutif in disparet lo lasenn politik. I paret sa defet elektoral in fer zot bokou ditor e zot pa konnen mannyer pour navige dan sa nouvo klima politik. Zot in toultan krwar ki zot ti pou diriz Sesel pour leternite me Seselwa ti met en fren avek zot lafoli grandè an Oktob lannen pase. Sa bate bef in deranz zot sistenm konpletman e kree dezord dan zot kan. Ennde bann aktivis pli brav pe fer zot mye pour anpes bato US pran fon e disparet totalman.

Tou lendikasyon pe montre ki Dokter Patrick Herminie in determinen pou pran labar e esey remet sa bato US ki'n pran bokou delo alaflot. Ansyen minis Dugasse osi in koste pour esey ed li tandis ki Msye Meriton, Madanm MacSuzy e Msye Simon Gill in fini pran lavol.



Malgre ki lanpir politik lafanmir Herminie in fini degrengole dan distrik Larivyèr Anglez (Neve Dokter ti ganny en bate bef dan dernyen eleksyon par en novis LDS) Dokter Herminie pe kanpany for pour li vin lider parti US. Antretan i pe azir koman defakto lider parti e Msye Sebastien Pillay i annan tou re-

zon pour li enkyet. Enn fwa ki Dokter Patrick Herminie i ganny elekte, Sebastien pou bezwen donn li son palto Lider Lopozisyon. Petet Dokter a koud en palto enpe pli gran pour li me Sebastien pour bezwen sed laplas. Pour dokter antre dan Lasanble Nasyonal, fodre enn i sorti. Lekel ki pour bezwen kile? Kakayonyont ou-

byen Madanm Reken? Sa pou en gro kankan sa.

Zanvye pe fini e eleksyon nouvo komite egzekutif US pa ankor ganny fer. Parye labitid, zot pour blanm tou keksoz lo COVID. I paret zot in menm oublie ki i annan teknolozi konmela ki permet eleksyon ganny fer san groupe. Konmdir kreol: ler oun divage; oun divage menm. Depi lannen komanse, parti US in fer sorti kominike lapres preski toulezour pour kritik tou sa ki gouvènmàn dirize par LDS pe fer me zot in oublie pou enform sa ptigit siporter ki reste akoz eleksyon zot komite egzekutif parti pa ankor fer parye zot ti'n prevwar. Zot in ebloui e zot pe krwar pou dir zot rol se opoz tou sa ki gouvènmàn i fer.

Dokter Herminie i konfize oubyen i malis?

Sa gro garson sorti Larivyèr Anglez, Dokter Patrick Herminie, in fer son retour lo lasenn politik Sesel. Sa voyaz i ti'n vin eklèrsi son semen dan son kanpany pour ganny elekte koman lider parti at-raver en konferans-de-pres. I pa en koensidans ki i ti abiyan nwanr. Parti US i dan dey; pa akoz enn zot manm ti'n mor me akoz parti i dan swen entansif e si dokter pa kalipa lanmor pou arive a nenport ki moman. Dan son detres e soufrans emosyonel, Dokter in esey son mye pour anvoy

lapo bannann lo gouvènmàn LDS. Dan sa moman pandemik, sel seval batay ki zot annan se COVID e Dokter Herminie pa'n perdi letan pour fwet sa seval. Malerezman i pa'n konn ekoute. Pour fini kont, in fer son lekor pas pour en vre boufon.

Koman en dokter e en sitwayen swadizan byen edike e byen enformen, Msye Patrick Herminie in demonstre son konfizyon. In esey blanm prezidan, Msye Wavel Ramkalawan, pour move desizyon lans kanpany vaksinyon dan Sesel. Dapre li, lotorite



Sinwan ti aprouv vaksen le 30 Desanm e desizyon pour donn vaksen Seselwa ti fer avan sa dat. Dokter Herminie i oule tou dimoun ekout son kon-
(kontinasyon lo paz 2)

Dokter Herminie i konfize oubyen i malis?

ferans-de-pres me i pa oule ekout konferans de pres lezot. Si i ti'n met son zorey apik letan Dokter Gedeon ti esplike ki Sesel ti pe esper laprouvasyon vaksen avan lans son program vaksinasyon i ti ava konpran. Malerezman i pa kontan ekoute.

Program vaksinasyon ti komans le 10 Zanvyè apre ki tou laprouvasyon neser ti'n gannnen. Malerezman okenn manm US dan Lasanble Nasyonal pa ti pran vaksen sa zour; zot ti menm fer sorti en kominike pour esplik zot rezon akoz. Apre tou sa lafanfar e konfizyon, Dokter Herminie in ankouraz tou dimoun pour pran vaksen e protez zot lekor kont sa viris. In osi

al pli lwen ki sa. In demann gouvènmman pour entansifye program vaksinasyon. Nou dir Dokter Herminie 'pa rat en sans. Pran ou pikir e protez ou lekor. Ou osi en zanfann Sesel'. Ler Dokter Herminie i fini pran son pikir, i a kapab antann keksoz pli byen. Tou dimoun ti tande ki plis ki 70 pousan Seselwa pou'n fini ganny vaksinen an Mars sa lannen pour nou kapab ganny sa ki an Angle i apel 'herd immunity'. Kote Dokter Herminie ti antann 25 pousan i reste en mister. Zot dir depresyon ennler i fer ou perdi konsantrasyon. Petet sanmenm ki'n arive avek Dokter.

Napa diplomasi dan laverite

Laverite se laverite. Laverite se dir keksoz mannyer i ete. Pa tou laverite ki zoli pour tande e se sa ki fer lopoziyon ankoler avek diskour leta lanasyon Prezidan Wavel Ramkalawan. Pour zot laverite se larogans, mank diplomasi e politik bonmarse.

Mwens ki 100 zour apre ki in vin prezidan dan en moman pli difisil dan listwar Sesel, Prezidan Wavel Ramkalawan i oblize anba konstitisyon donn en kont randi lepep Seselwa lo sitiasyon pei. Sa pa li ki deside. Konstitisyon ki obliz li. Alor i napa okenn swa me pou dir laverite lo sitiasyon. An premye lye, i oblize fer Seselwa konnen ki sitiasyon pei o moman ki in pran labar. In dekrir sitiasyon koman en kales kase kot in zwenn en dezord total dan ladministrasyon ansyen gouvènmman dirize par US; napa dokimantasyon, napa larzan e napa lord. Sa i larealite ki in trouve e in donn bann legzanp kler. In annan labi dan zestyon resours finansyel pei e en latitid lese fer. Sa pa vin koman en sirpriz pou personm me ladministrasyon oparavan ki ozordi lopoziyon i santi zot ofanse

ki sa laverite in ganny met an publik. Zot ti a kontan si tousala ti reste en sekre malgre zot pres latransparans. Dapre zot fason panse, dir laverite pa pour ede anmenn linite dan pei. Eski pour annan linite si napa laverite? Larepons i non. Osi lontan ki nou pa aksepte bann fot lepase, nou pa pou kapab bouz devan koman en nasyon. Wi, laverite i ofans son met me san laverite pour napa progre.

Tou fason lopoziyon i annan tou mwayen a son dispozisyon pour determinen si sa ki Prezidan Ramkalawan in dir i vre ou non. Olye kriy lasasen, zot kapab anmenn bann minis devan parlamen e demann kesyion pour eklersi zot dout. Se sa louvraz en lopoziyon responsab.

Sesel i selebre Lazournen Mondyal Pour Ledikasyon

Sesel pe komemor Lazournen Mondyal pour Ledikasyon pour premye fwa ozordi. Sa lazournen i normalman selebre le 24 Zanvyè me koman sa dat i tonm en dimans, desizyon in pran pou selebre li ozordi, Lendi le 25.

Tenm sa lannen i 'Rekipè e Renouvle Ledikasyon pour sa

Prezidan in dir: 'Pa zwe avek striktir leta'



Listwar sa parti politik ki dan lopoziyon ozordi i plen avek legzanp vyolans avan e apre koudeta. Avan koudeta zot ti ensit vyolans par met dife partou avek bonm dan loto anvil, dan lotel e radyo Sesel; apre koudeta zot in fer bokou Seselwa disparet oubyen forse kit pei.

Mank respe prezidan pei dan Lasanble Nasyonal i en kalite vyolans dan limenm e aksyon disiplinè tre serye i devret ganny pran pour anpese ki sa i ariv ankor. Annefe sa i en laont pour leta Seselwa kot en endividi avek en latitid vyolan i denigre en lenstitisyon sakre pei a en moman kot lemonn antye ti pe swiv deliberasyon nou Lasanble Nasyonal.

Ler zot ti opouvwar, zot pa'n aprann ditou. Pour tou sa lannen ki Prezidan Wavel Ramkalawan avek lezot koleg lopoziyon in dan Lasanble Nasyonal, zanmen enn antre zot in deza enteronp sef deta letan i pe fer son diskour. Sepoutan bann sef deta oparavan ti ordonn tou sort kalite aksyon kont zot enkli kas zot latet e ferm zot dan kaso detanzantan. Malgre tousala, Msye Ramkalawan e lezot in toultan fer tande zot lavwa san mank respe lenstitisyon leta. Sa nouvo lopoziyon i annan bokou pour aprann. Akoz zot pa rod konsey avek bann ki'n la avan zot?

Dan son diskour Leta la Nasyon vandredi le 22, Prezidan Larepublik in anvoy en mesaz byen kler pour tou Seselwa enkli bann dirizan parti lopoziyon dan Lasanble Nasyonal. In dir pa zwe avek striktir leta me i paret bann manm US dan Lasanble Nasyonal pa'n konpran ditou. Enn zot manm in komet pli gro lofans mank respe dan parlamen e enteronp prezidan larepublik letan i ti pe delivre son ladres. Sa kalite malelve zanmen in deza arive dan listwar nou pei e rezon akoz sa in arive i senp.

Bann manm Lasanble Nasyonal US pa kapab tolere ki en endividi sorti dan en lot parti politik i vin prezidan pei. Zot polisi 'ek nou, pa ek nou' in anzandre dan zot lavenn e zot ankor krwar koudeta ti zistifye. I annan en danze avek sa kalite latitid akoz zot krwar i normal pour mank respe e fer rebelyon kont leta pour atenn pouvwè politik.

Zenerasyon COVID-19'. Dan son mesaz pour sa lokazyon, Minis pour ledikasyon in fer sorti ki sa tenm i envit tou pei lemonn pour met Ledikasyon o sant sa staz rekipèrasyon pour sa pandemi. I en lapel pour annan solidarite lo nivo mondyal. Pour lemonn kapab geri efektivman e vitman, i enportan pour investi dan Ledikasyon.

Minis in osi pran sa loportinite pour remersye tou dimoun ki dan en fason ou en lot i'n aziste zot resours ek lafors pour siport sistenm Ledikasyon; bann lekol publik e prive pour zwenn zot bann laspirasyon malgre sa pandemi. In osi swet bann travayer ek bann partener dan Ledikasyon le meyer pour lannen 2021.